


唐詩所前集

三十七

廿七


漢書門類			
一	八	四	三
冊	函	號	類
三	四	〇	一
冊	架	函	號

內閣文庫			
三	一	八	漢
九	二	四	書
函	冊	三	類
一	三	四	
六	二	三	
架	冊	號	



內閣文庫	
番號	漢 11843
冊數	32 (27)
函號	319 124

五言排律



詩所第三十七卷

排律

前集

頌信安王幕府

序曰開元二十年國家有事林胡

考功郎中王公同勳郎中劉公主客郎中魏公

待御史李公監察御史崔公咸在幕府詩以頌

美數公見於詞苑十韻

高適

雲紀軒黃代星高太白年廟堂咨上策幕府制中權盤
石藩維固昇壇禮樂先國章榮印綬公服貴貂蟬樂善
旌深德輸忠格上玄剪桐光寵錫題劔美貞堅聖祚雄
圖廣師貞武德虔雷霆七校發旌旆五營連華省徵羣
又霜臺舉二賢豈伊公望遠曾是茂才遷竝秉韜鈴術
兼該翰墨筵帝思麟閣像臣獻柏梁篇振玉登遼甸從

金歷薊孺度河飛羽檄橫海泛樓船北伐聲逾邁東征
務以專講戎喧涿野料敵靜居延軍勢持三略兵戎自
九天朝瞻授鉞去時聽偃戈旋大漠風沙裏長城雨雪
邊雲端臨碣石波際隱朝鮮夜壁衝高斗寒空駐綵旃
倚弓玄兔月飲馬白狼川庶物隨交泰蒼生解倒懸四
郊增氣象萬里絕風煙關塞鴻勳著京華甲第全落梅
橫吹後春色凱歌前直道常兼濟微才獨棄捐曳裾誠
已矣投筆尚悽然作賦同元淑能詩匪仲宣雲霄不可
望空欲仰神仙

贈溫駙馬汝陽王

徐晶

疇昔承餘論文章幸濫推夜陪銀漢賞朝奉桂山詞梁
邸調歌日秦樓按舞時登高頻作賦體物屢爲詩連騎
長楸下浮觴曲水湄北堂畱上客南陌送佳期憶昨陪
臨汎于今阻宴私再看冬雪滿三見夏花滋都尉朝青
閣淮王侍紫墀寧知倦遊者華髮老京師

贈特進汝陽王

杜甫

特進羣公表天人夙德升霜蹄千里駿風翮九霄鵬服
禮求毫髮推忠忘寢興聖情常有眷朝退若無憑仙醴
求一作來浮蟻奇毛或賜鷹清關塵不染一作雜中使日相
乘晚節嬉遊簡平居孝義稱自多親棣萼誰敢問山陵

學業醇儒富辭華哲匠能筆飛鸞聳立章罷鳳騫騰精
 理通談笑忘形向友朋寸長一作堪繾綣一諾豈驕矜
 已忝歸曹植何如一作對李膺招要恩屢至崇重力難
 勝披霧初歡夕高秋爽氣澄樽罍臨極浦鳧宿張燈
 花月窮遊宴炎天避鬱蒸硯寒金井水簷動玉壺冰瓢
 飲唯三徑巖棲在百層一作異一作謬持蠡測海况挹酒如
 澗鴻寶寧全秘丹梯庶可陵淮王門有客終不媿孫登
 贈張丞相張丞相與予有孝廉校理之舊又代余
 為荊州余改漢陽仍兼按使巡至荊州
 故有此贈

宋鼎

漢上登飛幟荆南歷舊居已嘗臨砌橘更覩躍池魚盛
 德繼微眇深衷能卷舒義申蓬閣際情切廟堂初郡挹
 文章美人懷燮理餘皇恩儻照亮豈厭承明廬

贈張左丞崔禮部崔光祿

序曰僕自湯還都經龍門北谿莊宿張左丞崔

禮部崔光祿並枉垂光顧數公宿敦道義雅尚
 林壑謂急於幽尋故此命駕遂不知別有勝賞
 偶然相遇寒暄未周神意已往雲霞之致蔑而
 不存逸轡放驅清塵徒企耿耿不已而贈是詩

韋嗣立

栖閒有愚谷好事枉朝軒樹接前驅擁巖傳後騎喧
 褰簾出野院植杖候柴門旣拂林下席仍携池上樽
 深期契幽賞實謂展歡言末眷誠未易佳遊時更敦
 俄看嘯儔侶各已共飛騫延睇盡朝日長懷通夜魂
 空聞岸竹

動徒見浦花繁多愧春鶯曲樽求意獨存

酬韋祭酒

張說

聞君湯井至瀟灑憩郊林拂曙携清賞披雲覲一作綠

岑歡言遊覽意欸曲望歸心是日期佳客同山忽異尋

桃花迂一作緣路轉楊柳間門深汎舟伊水漲繫馬香樹

陰繁絃弄水族嬌吹狎沙禽春滿汀色媚景斜嵐氣侵

懷仁殊未遠重德匪專臨來藻敷幽思連詞報所欽

贈韋左丞丈濟

杜甫

左轄頻虛位今年得舊儒相門韋氏在經術漢臣湏時

議歸前烈一作列天倫恨莫俱鵠原荒宿草鳳沼接一作

有客雖安命衰容豈壯夫家人憂几杖甲子混泥塗不
謂矜餘力還來謁大巫歲寒仍顧遇日暮且踟躕老驥
思千里饑鷹待一呼君能微感激亦足慰榛蕪

贈司勳蕭郎中

張子容

作相開黃閣爲郎奏赤墀君臣道合體父子貴同時國

以推賢答家無內舉疑鳳池真水鏡蘭省得華滋未覩

風流日先聞新一作所賦詩江山清謝朓花木媚丘遲吏

部來何暮王言念在茲丹青無不可霖雨亦相期昔我

投荒處孤煙望島夷羣鷗終日狎落葉數年悲漁父畱

歌詠江妃入興詞今將獻知己相感勿吾欺

贈比部蕭郎中十兄

杜甫

有美生人傑由來積德門漢朝丞相系梁日帝王孫蘊
藉為郎久魁梧秉哲尊詞華傾後輩風雅藹孤騫宅相
榮姻戚兒童惠討論見知真自幼謀拙媿諸昆漂蕩雲
天闊沈埋日月奔致君時已晚懷古意空存中散山陽
鍛愚公野谷村寧紆長者轍歸老任乾坤

贈李郎中

楊浚

仙郎早朝退直省臥南軒院竹自成賞階庭寂不喧焚
香開後閣起草閉前門禮樂風流美光華星位尊榮兼
朱紱貴交乃布衣存是日登龍客無忘君子恩

贈史郎中

江夏使君席上作

李白

鳳凰丹禁裏銜出紫泥書昔放三湘去今還萬死餘仙
郎久為別客舍問何如涸轍思流水浮雲失舊居多慙
華省貴不以逐臣疎復如竹林下叨一作而陪芳宴初希
君生羽翼一化北溟魚

贈張均員外

盧象

公門世緒一作業昌才子冠裴王出自平津邸還為吏部
郎神仙餘氣色列宿動一作助輝光夜直南宮靜一作近
朝趨北禁長時人歸一作窺水鏡明主賜衣裳翰苑飛鸚
鵡天池待鳳凰承歡一作欣疇日顧未紀一作記後時傷去

去圖南遠微才幸不忘

晚春詣蘇州敬贈武員外

王灣

蘇臺憶季常飛棹歷江鄉持此功曹掾初離一作華省

郎貴門生禮樂明代秉文章嘉郡一作璧位先進鴻儒名

重揚爰從姻婭一作戚貶豈失忠信防萬里行驥一作汗馬足

十年睽鳳翔迴遷翊元聖入拜佇惟良別業對南浦羣

書滿北堂意深投轄盛才重接筵光陋學叨鉛簡弱齡

詞翰場神馳勞舊國顏展別殊方際曉雜氛散殘春衆

物芳煙和疎樹滿雨續小谿長旅拙感成慰通賢顧不

忘從來琴曲罷開匣為君張

贈裴南部

聞袁判官自來欲有按問

杜甫

塵滿萊蕪甑堂橫單父琴人皆知飲水公輩不偷金梁

獄書應作一作因上秦臺鏡欲臨獨醒時所嫉羣小謗能深

卽出黃沙在何一作應湏白髮侵使君傳舊德已見直繩

心

贈崔侍郎

李白

長劔一杯酒男兒方寸心洛陽因劇孟託宿話胸襟但

仰山嶽秀不知江海深長安復攜手再顧重千金君乃

輶軒一作軒轅佐余叨翰墨林高風摧秀木虛彈落驚禽不

取迴舟興而來命駕尋扶搖應一作因借力一作便桃李願

成陰笑吐張儀舌愁爲莊舄吟誰憐明月夜腸斷聽秋
砧

贈鄭諫議

杜甫

諫官非不達詩義早知名破的由來事先鋒孰敢爭思
飄雲物外律中鬼神驚毫髮無遺恨波瀾獨老成野人
寧得所天意薄浮生多病休儒服冥搜信客旌築居仙
縹緲旅食歲崢嶸使者求顏闔諸公厭襜衡將期一諾
重歛使寸心傾君見窮途哭宜憂阮步兵

中丞宋公以吳兵三千赴河南軍次潯陽脫余之
囚參謀幕府因贈之

李白

獨坐清天下專征出海隅九江皆渡虎三郡盡還珠組
練明秋浦樓船入郢都風高初選將月滿欲平胡殺氣
橫千里軍聲動九區白猿慙劒術黃石借兵符戎虜行
當剪鯨鯢立可誅自憐非劇孟何以佐良圖

贈封御史入臺

蘓味道

故事推三獨茲辰對兩闈夕鴉共鳴舞屈草接芳菲盛
府題清一作持青橐殊章動繡衣風連臺閣起霜就簡書飛
凜凜當朝色行行滿路威惟當擊隼去復覩落鵬歸

贈右臺監察鄧茂遷左臺殿中

劉懷一

惟昔參多士無雙仰異才鷹鷂同效逐鷓鷯忝遊陪入

仕光三命遷榮歷二臺隔墻欽素躅對問限清埃紫署
春光早蘭闈曙色催誰言夕鳥至空想鄧林隈

贈王二十四侍御契

杜甫

往往雖相見飄飄媿此身不關輕紱冕俱是避風塵一
別星橋夜三移斗柄春敗亡非赤壁奔走為黃巾子去
何瀟灑余藏異隱淪書成無過鴈衣故有懸鶉恐懼行
裝數伶俜臥疾頻曉鶯工迸淚秋月解傷神會面嗟鰲
黑含悽話苦辛接輿還入楚王粲不歸秦錦里殘丹竈
花谿得釣綸消中祇自惜晚起索誰親伏柱聞周史乘
槎有一作似漢臣鷓鴻不易狎龍虎未宜馴客即挂冠至

交非傾蓋新由來意氣合直取性情真浪跡同生死無
心恥賤貧偶然存蔗芋幸各對松筠麤飯依他日窮愁
怪此辰女長裁褐穩男大卷書勻游口江如練蠶崖雪
似銀名園當翠巘野棹沒青蘋屢喜王侯宅時邀江海
人追隨不覺晚欵曲動彌旬但使芝蘭秀何煩棟宇鄰
山陽無俗物鄭驛正畱賓出入並鞍馬光輝忝席珍重
遊先主廟更歷少城闈石鏡通幽鬼琴臺隱絳脣送終
惟糞土結愛獨荆榛置酒高林下觀碁積水濱區區甘
累趼稍稍息勞筋網聚粘圓鯽絲繁煮細尊長歌敲柳
癭小睡凭藤輪農月須知課田家敢忘勤浮生難去食

良會惜清晨列國兵戈暗今王德教淳要聞除猘猢休
作畫麒麟洗眼看輕薄虛懷任屈伸莫令膠漆地萬古
重雷陳

贈太常張卿均

方丈三韓外崑崙萬國西建標天地闊詣絕古今迷氣
得神仙迴恩承雨露低相門清議衆儒術大名齊軒冕
羅天闕琳琅識介珪伶官詩必誦夔樂典猶稽健筆凌
鸚鵡銛鋒瑩鷓鴣友于皆挺拔公望各端倪通籍踰青
瑣亨衢照紫泥靈虬傳夕箭歸馬散霜蹄能事聞重譯
嘉謨及遠黎弼諧方一展班序更何躋適越空顛躓遊

梁竟慘悽謬知終

將一

畫虎微分是醯雞萍泛無休日

桃陰想舊蹊吹噓人所羨騰躍事仍睽碧海真難涉青
雲不可梯顧深慙鍛鍊才小辱提攜檻束哀猿叫枝驚
夜鵲棲幾時陪羽獵應指釣璜谿

贈翰林張四學士垵

翰林逼華蓋鯨力破滄溟天上張公子宮中漢客星賦
詩拾翠殿佐酒望雲亭紫誥仍兼綰黃麻似六經內分
金帶赤恩與荔枝青無復隨高鳳空餘泣聚螢此生任
春草垂老獨漂萍儻憶山陽會悲歌在一聽

贈鮮于京兆

王國稱多士賢良復幾人異才應間出爽氣必殊倫始
見張京兆宜居漢近臣驂騑開道路雕鶚離風塵侯伯
知何算文章實致身奮飛超等級容易失迹淪脫略蟠
谿釣操持郢匠斤雲霄今已逼台袞更誰親鳳穴雛皆
好龍門客又新義聲紛感激敗績自逡巡途遠欲何向
天高難重陳學詩猶孺子鄉賦念嘉賓不得同晁錯吁
嗟後郟詵計疎疑翰墨時過憶松筠獻納紆皇眷中間
謁紫宸且隨諸彥集方凱薄才伸破膽遭前政陰謀獨
秉鈞微生霑恩刻萬事益酸辛交合丹青地恩傾雨露
辰有儒愁餓死早晚報平津

贈蕭二十使君

昔在嚴公幕俱爲蜀使臣艱危參大府前後間清塵起
草鳴先路乘槎動要津王鳧聊暫出蕭雉只相馴終始
任安義荒蕪孟母鄰聯翩匍匐禮意氣死生親張老存
家事稽康有故人食恩慙鹵莽鏤骨抱酸辛巢許山林
志夔龍廊廟珍鵬圖仍矯翼熊軾且移輪磊落衣冠地
蒼茫土木身墳笳鳴自合金玉瑩逾新重憶羅江外同
遊錦水濱結歡隨過隙懷舊益一作憶霑巾曠絕含香舍
稽畱伏枕辰停驂雙闕早回鴈五湖春不達長卿病從
來原憲貧監河受貸粟一起轍中鱗

真定卽事奉贈韋使君

高適

漂泊懷書客遲迴此路隅問津驚棄置投刺忽踟躕方
伯恩一作思彌重蒼生詠已蘇郡稱廉叔度朝議管夷吾
乃繼三台側仍將四岳俱江山澄氣象崖谷倚冰壺詔
寵金門策官榮葉縣鳧擢才登粉署飛步躡雲衢起草
徵調墨焚香卽宴娛光華揚盛矣霄漢在茲乎隱軫推
公望逶迤協帝俞軒車辭魏闕旌節副幽都始佩仙郎
印俄兼太守符尤多蜀郡理更得潁川謨城邑推雄鎮
山川列簡圖舊燕當絕漠全趙對平蕪曠野何瀰漫長
亭復鬱紆始泉遺俗近活水戰場無月換思鄉陌星迴

記斗樞歲容歸萬象和氣發瀉鑪淪落而誰遇栖遑有
是夫不才羞擁腫干祿謝侏儒契闊慚行邁羈離憶友
于田園同季子儲蓄異陶朱方欲呈高義吹噓揖大巫
永懷吐肝膽猶憚阻榮枯解榻情何限忘言道未殊從
來貴縫掖應是念窮途

東平旅遊贈薛太守

頌美馳千古欽賢仰大猷晉公標逸氣汾水注長流神
與公忠節天生將相儔青雲本自負赤縣獨推尤御史
風逾勁郎官草屢修鸞鸞粉署起鷹隼柏臺秋出入交
三事飛鳴揖五侯軍書陳上策廷議借前籌肅肅趨朝

排律 卷三十一
列雝雝引帝求一麾俄出守千里再分憂不改任棠水
仍傳晏子裘歌謠隨舉扇旌旆逐鳴騶郡國長河遶川
原大野幽地連堯泰嶽山向禹青州汶上春帆渡秦亭
晚日愁遺墟當少昊懸象逼奎婁卽此逢清鑒終然喜
暗投叨承解榻禮更得問縑遊高興陪登陟嘉言忝獻
酬觀慕知戰勝探象會冥搜眺聽情何限冲融惠勿休
祇應齊語默寧肯問沈浮然諾長懷季栖遑輒累丘平
生感知已方寸豈悠悠

贈蘇少府赴任江南

余時還京

崔湜

丈夫不歎別達士自安卑攬泣固無趣銜杯空爾爲流

雲春窈窕去水暮逶迤行舟忽東泛歸騎亦西馳秦地
多芳草江潭有桂枝雖一作誰言阻遐闊所貴在相知

贈蕭少府

孟浩然

上德如流水安仁道若山聞君秉高節爲

一作而

得奉清

顏鴻漸昇儀

一作台

羽牛刀列下班處腴能不潤居劇體

常聞去詐人無諂除邪吏息姦欲知清與潔明月照

一作

在澄灣

贈將軍重出塞

和陸明府

陳子昂

忽聞天上將關塞重橫行始返樓蘭國還向朔方城黃
金裝戰馬白羽集神兵星月開天陣山川列地營晚

一作

曉風吹盡角春色耀飛旌寧知班定遠一作是獨一作是一書

生

贈虞十五司馬

杜甫

遠師虞秘監今喜識玄孫形象丹青逼家聲器宇存淒涼
憐筆勢浩蕩問辭源爽氣金天豁清談玉露繁佇鳴南嶽
鳳欲化北溟鯤交態知浮俗儒流不異門過逢連客位
日夜倒芳樽沙岸風吹葉雲江月上軒百年嗟已半四座
敢辭喧書籍終相與青山隔故園

贈盧五丈參謀琚

恭惟同白出妙選異高標入幕知孫楚披襟得鄭僑丈

人藉才地門闕冠雲霄老矣逢迎拙相於契託饒賜錢
傾府待爭米駐船遙鄰好艱難薄氓心杼軸焦客星空
伴使寒水不成潮素髮乾垂領銀章破在腰說詩能累
夜醉酒或連朝藻翰惟牽率湖山合動搖時清非造次
興盡却蕭條天子多恩澤蒼生轉寂寥休傳鹿是馬莫
信鵬如一作為鴉未解依依袂還斟泛泛瓢流年疲蟋蟀
體物幸鷓鴣孤負滄洲願誰云晚見招

贈蘇味道

杜審言

北地寒應苦南庭戍未一作不歸邊聲亂羌笛朔氣卷戎
衣雨雪關山暗風霜草木稀胡兵戰欲盡漢卒尚重圍

雲淨妖星落秋深塞馬肥據鞍雄劍動搖一作筆羽書
飛輿駕還京邑朋游滿帝畿方期來獻凱歌舞共春輝

贈崔融

十年俱薄宦萬里各他方雲天斷書札風土異炎涼太
息幽蘭紫勞歌奇樹黃日疑懷叔度夜似憶真長北使
從江左一作表東歸在洛陽相逢慰疇昔相對敘存亾草
深窮巷毀竹盡故園荒雅節君彌固衰顏余自傷人事
盈虛改交游寵辱妨雀羅爭去翟鶴斃競一作更尋王思
極歡娛至朋情詎可忘琴樽橫宴席巖谷一作沼臥詞場
連騎追佳賞城中及路傍三川宿雨霽四月晚花芳復

此開懸榻寧唯入後堂與酣鴈鴒舞言洽鳳皇翔高選
俄遷職嚴程已飭裝撫躬銜道義携手戀輝光玉振先
推美金銘舊所防勿嗟離別易行役共時康

贈李徵君大壽

王績

孔淳辭散騎陸昶謝中郎幅巾朝帝罷杖策去官忙附
車還趙郡乘船向武昌九徵書未已十辟譽彌彰副君
迎綺季天子送嚴光灞陵幽徑近磻谿隱路長編蓬還
作室績草更爲裳會稽置樵處蘭陵賣藥行看書惟道
德開教止農桑別有幽懷侶由來高讓王前年辭厚幣
今歲返寒鄉有書橫石架無羶坐土牀蘭英猶足釀竹

實本無糧澗松寒轉直山菊秋自香管寧存祭禮王霸
重朝章去去相隨去披裘驕盛唐

贈易秀才

李白

少年解長劔投贈卽分離何不斷犀象精光暗往時蹉
跎君自惜竄逐我因誰地遠虞翻老秋深宋玉悲空摧
芳桂色不屈古松姿感激平生意勞歌寄此辭

贈滎陽馬氏二子

儲光羲

聖君封太嶽十月建行旃輦路開千里寒雲霽九天故
人多侍從二子畱伊川河兗冰初合關城月屢圓暝過
滎水上聞說鄭卿賢才蔽行人右名居東里先制巖開

別業桑柘亦依然待至金園側相將居一廛

題居延古城贈喬十二知之

陳子昂

聞君東山意宿習

一作昔

紫芝滎滄洲今何在華髮旅邊

城還漢功旣薄逐胡策未行徒嗟白日暮坐對黃雲生
桂枝芳欲晚蕙苾謗誰明無爲空自老含歎負生平

移居公安敬贈衛鈞

杜甫

衛侯不易得余病汝知之雅量涵高遠清襟照等夷平
生感意氣少小愛文辭河海由來合風雲若有期形容
勞宇宙質朴謝軒墀自古幽人泣流年壯士悲水煙通
徑草秋露接園葵入邑豺狼鬪傷弓鳥雀飢白頭供宴

語焉几伴棲遲交態遭輕薄今朝豁所思

南還以詩代書贈京師舊寮

張九齡

薄宦晨昏闕尊尊義取斯窮愁年貌改寂蔑

一作爾胡

爲不諂詞多忤無容禮益卑微生尚何有遠跡固其宜

思擾梁山曲情遙越鳥枝故園從海上良友邈天涯靈

雨歎一別川原勞載馳上慚伯樂顧中負叔牙知去國

誠寥落經途弊險巇歲逢霜雪苦林屬蕙蘭萎欲贈幽

芳歇行悲舊賞移一從關作限兩見月成規苒苒窮年

籥行行盡路岐征鞍稅北渚歸帆指南垂樹晚猶蔥蒨

江寒尚渺瀾土風從楚別山水入湘奇石瀨相奔觸煙

林更蔽虧層崖夾洞浦輕舸汎澄漪松篠行皆傍禽魚

動輒隨惜哉邊地隔不與故人窺疇昔陪鴛鴦朝陽振

羽儀來音雖寂寞接景每逶迤朝罷冥塵事實來話酒

卮邀歡逐芳草結興選華池及此風成歎何時霧可披

自憐無用者誰念有情離望美音容闊懷賢夢想疲因

聲達霄漢持拙守東陂

在軍中贈先還知己

駱賓王

蓬轉俱行役瓜時獨未還魂迷金闕路望斷玉門關獻

凱多慙霍論封

一作功

幾謝班風塵催白首歲月損紅顏

落鴈低秋塞驚鳧起暝灣胡霜如劔鏑漢月似刀鐮別

後邊庭樹相思幾度攀

畱贈集賢院崔于二學士崔國輔于休烈也杜甫

昭代將垂白途窮乃叫閤氣衝星象表詞一作詩感帝王

尊天老書題目春官驗討論倚風遺鴟路隨水到龍門

竟與蛟螭雜寧無燕雀喧青雲一作冥猶契閭陵厲不飛

翻儒術誠難起家聲庶已存故山多藥物勝槩憶桃源

欲整還鄉旆長懷禁掖垣謬稱三賦在難述二公恩

東平畱贈狄司馬曾與田安西充判官高適

古人無宿諾茲道未一作以為難萬里赴知己一言誠可

歎馬蹄經月窟劍術指樓蘭地出北庭盡城臨西海寒

森然瞻武庫則是一作剛若弄儒翰入幕縮銀綬乘軺兼鐵

冠練兵日精銳殺敵無遺殘獻捷見天子論功俘可汗

激昂丹墀下顧眄青雲端誰謂縱橫策翻為權勢干將

軍既坎壈使者亦辛酸耿介挹一作揖三事羈離從一官

知君不得意他日會鵬搏

寄贈齊公 杜淹

冠蓋遊梁日詩書問志年佩蘭長坂上攀桂小山前結

交淡若水履道直如弦此歡終未極于茲獨播遷赭衣

登蜀道白首別秦川淚隨溝水逝心逐曉旌懸去去逾

千里悠悠隔九天郊野間長薄城闕隱凝煙關門共月

對山路與雲連此時寸心裏難用尺書傳

贈嚴倉曹乞推命錄

陳子昂

少學縱橫術遊楚復遊燕栖遑長委命富貴未知天聞
道沈冥客青囊有祕篇九宮探萬象三算極重玄願奉
唐生訣將知躍馬年非同一作墨翟問空滯殺龍川

將別巫峽贈南卿兄瀼西果園四十畝

杜甫

苔竹素所好萍蓬無定居遠遊長兒子幾地別林廬雜
藥紅相對他時錦不如具舟將出峽巡圃念攜鋤正月
喧鶯未茲辰放鷁初雲籬梅可折風榭柳微舒託贈卿

家有因歌野興疎殘生逗江漢何處狎樵漁

劉侍讀見和山邸篇什重申此贈 李嶠

神嶽瑤池圃仙宮玉樹林垂時警天御清暑滌宸襟梁
駕陪玄賞淄庭掩翠岑對巖龍岫出分壑鴈一作池深
簷迴松蘿映牕高石鏡臨落泉奔澗響鶯吹助猿吟野
氣迷涼燠山花雜古今英藩盛賓侶勝景想一作招尋
踐徑披蘭葉攀崖引桂陰穆生時泛醴鄒子或調琴雉
霧分場合魚鈎向浦沈朝遊極斜景夕宴待橫參顧已
慙鉛鐔叨名齒毒簪暫依朱邸館還暢白雲心丘壑信
多美煙霞得所欽寓言攄宿志竊吹簡知音獎價踰珍

石酬文重振金方從仁智所携手濯清潯

初發道中贈王司馬兼寄諸公

張九齡

昔歲嘗陳力中年退屏居承顏方弄鳥放性或觀魚曾
是安疵拙誠非議卷舒林園事益簡煙月賞恒餘不意
棲愚谷無階奉詔書湛恩均大造弱植愧空虛肅命趨
仙闕僑裝撫傳車念行開祖帳憐別降題輿誰謂風期
許叨延禮數殊一作除義沾投分末情及解携初追餞扶
江介光輝燭里閭子雲應寂寞公叔一作緒為吹噓景物
春來異音容日向疎川原行稍穩鐘鼓聽猶徐林隱王
公輦雲迷班氏廬戀親唯委咽思德更躊躇狗義當由

此懷安乃闕如願酬明主惠行矣豈徒歟

久滯越中貽謝南池會稽賀少府 孟浩然

陳平無產業尼父倦東西負郭昔云翳問津今亦一作已

迷未能忘魏闕空此滯秦稽兩見夏雲起再聞春鳥啼

懷仙梅福市訪舊若耶谿聖主賢為寶君一作卿何隱遯

棲

同豆盧峯貽主客李員外賢子棐 杜甫

鍊金歐冶子噴玉大宛兒符彩高無敵聰明達所為夢
蘭他日應折桂早年知爛熳通經術光芒刷羽儀謝庭
瞻不遠潘省會於斯唱和將雛曲田翁號鹿皮

太學貽張筠

儲光義

璧池忝門子俄傾變炎涼綠竹深虛館清流響洞房園
林在建業新友去咸陽中夜鼓鐘靜初秋漏刻長浮雲
開太室華蓋上明堂空此遠相望勞歌還自傷

首春貽京邑文士

盧照隣

寂寂罷將迎門無車馬聲橫琴答山水披卷閱公卿忽
聞歲云晏倚杖出簷楹寒辭楊柳陌春滿鳳凰城梅花
扶院吐蘭葉繞階生覽鏡改容色藏書畱姓名時來不
假問生死任交情

至望喜矚目言懷貽劍外知己

聖圖夷九折神化掩三分緘愁赴蜀道題拙奉虞薰隱
麟度深谷遙裔上高雲碧流遞縈注青山互糾紛澗松
咽風緒巖花濯露文思北常依馭圖南每喪羣無由召
宣室何以答吾君

還赴蜀中貽示京邑遊好

籀宿花初滿章臺柳向一作尚飛如何正此日還望昔多

違悵別風期阻將乖雲會稀歛衽辭丹闕懸旗陟翠微
野禽喧戍鼓春草變征衣回顧長安道關山起夕霏

寄韋有夏郎中

杜甫

省郎憂病士書信有柴胡飲子頻通汗懷君想報珠親

知天畔少藥餌峽中無歸楫生衣臥春鷗洗翅呼猶聞
上急水早作取平塗萬里皇華使爲僚記腐儒

寄李十四員外布

時新除司議郎萬州別駕雖尚
伏枕已聞理裝

名參漢望苑職述景題輿巫峽將之郡荆門好附書遠
行無自苦內熱比何如正是炎天闊那堪野館疎黃牛
平駕浪畫鷁上凌虛試待盤渦歇方期解纜初悶能過
小徑自爲摘嘉蔬渚柳元幽僻村花不掃除宿陰繁素
柰過雨亂紅蕖寂寂夏先晚泠泠風有餘江清心可瑩
竹冷髮堪梳直作移巾几秋帆發敝廬

承沈八丈東美除膳部員外郎阻雨未遂馳賀奉

寄此詩

今日西京掾多除南省郎通家惟沈氏謁帝似馮唐詩
律羣公問儒門舊史長清秋便寓直列宿頓輝光未暇
申安慰含情空激揚司存何所比膳部默悽傷貧賤人
事略經過霖潦妨禮同諸父長恩豈布衣忘天路牽騏
驥雲臺引棟梁徒懷貢公喜颯颯鬢毛蒼

襄陽早秋寄岑侍郎

崔湜

江城秋氣早旭日坐南闌落葉驚衰鬢清霜換旅衣時
來矜早達事往覺前非體道徒推理防身終昧微故人
金華省肅穆秉天機誰念江漢廣蹉跎心事違

閒園卽事寄韋侍御

蘇頌

結廬東城下直望江南山青靄遠相接白雲來復還拂
筵紅蘚上開幔綠條間物應春偏好情忘趣轉閒憲臣
饒美度一作改聯事惜徂顏有酒空盈酌高車不可攀

寄岳州賈司馬六丈巴州嚴八使君兩閣老

杜甫

衡嶽啼猿裏巴州鳥道邊故人俱不利謫宦兩悠一作油
然開闢乾坤正榮枯雨露偏長沙才子遠釣瀨客星懸
憶昨趨行殿殷憂捧御筵討胡愁李廣奉使待張騫無
復雲臺仗虛修水戰船蒼茫城七十流落劔三千畫角

吹一作歌秦晉旄頭俯澗瀍小儒輕董卓有識笑苻堅浪

作禽填海那堪血射天萬方思助順一鼓氣無前陰散

陳倉北晴薰太白顛亂麻屍積衛破竹勢臨燕法駕還

雙闕王師下八川此時霑奉引佳氣拂周旋貔虎開金

柙一作金甲麒麟受玉鞭侍臣諳入仗廐馬解登仙花動


朱樓雪城凝碧樹煙衣冠心慘愴故老淚潺湲哭廟悲

風急朝正暮景鮮月分梁漢米春得一作給水衡錢內藥

繁於纈宮莎軟勝綿恩榮同拜手出入最隨肩晚著華

堂醉寒重繡被眠轡齊兼秉燭書枉滿懷牋每覺昇元

輔深期列大賢秉鈞方咫尺鍛翮再聯翮禁掖朋從改



微班性命全青蒲甘受戮白髮竟誰憐弟子貧原憲諸
 生老伏虔師資謙未達鄉黨敬何先舊好腸堪斷新愁
 眼欲穿翠乾危棧竹紅膩小湖蓮賈筆論孤憤嚴詩賦
 幾篇定知深意苦莫使衆人傳貝錦無停織朱絲有斷
 絃浦鷗防碎首霜鶻不空拳地僻昏炎瘴山稠隘石泉
 且將棋度日應用酒爲年典郡終微眇治中實棄捐安
 排求傲吏比興展歸田去去才難得蒼蒼理又玄古人
 稱逝矣吾道卜終焉隴外翻投跡漁陽復控弦笑爲妻
 子累甘與歲時遷親故行稀少兵戈動接聯他鄉饒夢
 寐失侶自迍邐多病加淹泊長吟阻靜便如公盡雄俊

志在必騰騫

寄董卿嘉榮

聞道君牙帳防秋近赤霄下臨千嶺一作雪却背五繩
 橋海內久戎服京師今晏朝犬羊曾爛熳宮闕尚蕭條
 猛將宜嘗膽龍泉必在腰黃圖遭汚辱月窟可焚燒會
 取干戈利無令斥候驕居然雙捕虜自是一嫖姚落日
 思輕騎高一作天憶射鵰雲臺畫形像皆爲掃氛妖

寄河南韋尹

甫敞廬在偃師承韋公頻相訪問故有下句

有客傳河尹逢人問孔融青囊仍隱逸章甫尚西東鼎
 食爲門戶詞場繼國風尊榮瞻地絕疎放憶途窮濁酒

尋陶令丹砂訪葛洪江湖漂短一作短褐霜雪滿飛蓬牢
 落乾坤大周流道術空謬慙知薊子真怯笑楊雄盤錯
 神明懼謳歌德義豐尸鄉餘土室難說一作誰話祝雞翁

寄劉峽州伯華使君

峽內多雲雨秋來尚鬱蒸遠山朝白帝深水謁夷陵遲
 暮嗟為客西南喜得朋哀猿更起坐落鴈失飛騰伏枕
 思瓊樹臨軒對玉繩青松寒不落碧海闊逾澄昔歲文
 為理羣公價盡增家聲同令聞時論以儒稱太后當朝
 肅多才接迹昇翠虛捎颺颺丹極上鷗鵬宴引春壺酒
 恩分夏簾冰雕章五色筆紫殿九華燈學並盧王敏書

借褚薛能老兄真不墜小子獨無承近有風流作聊從

月窳一作繼

一作繼

徵放蹄知赤驥捩翅服蒼鷹卷軸來何晚襟

懷庶可憑會期吟諷數益破旅愁疑雕刻初誰料纖毫
 欲自矜神融躡飛動戰勝洗侵陵妙取筌蹄棄高宜百
 萬層白頭遺恨在青竹幾人登回首追談笑勞歌跼寢
 興年華分已矣世故莽相仍刺史諸侯貴郎官列宿應
 潘生驂一作安雲閣遠黃霸壘書曾乳贇號攀石饑鼯訴落
 藤藥囊親道士灰劫問胡僧憑久烏皮綻簪稀白帽稜
 林居看蟻穴野食待魚膾筋力交凋喪飄零免戰兢皆
 為百里宰正似六安丞姪女縈新裏丹砂冷舊秤但求

椿壽永莫慮杞天崩鍊骨調情性張兵撓棘衿養生終
自惜代數一作伐叛必全懲政術甘疎誕詞場媿服膺展懷
詩頌魯割愛酒如澠咄咄寧書字冥冥欲避矰江湖多
白鳥天地有青蠅

當塗界寄裴宣州

張九齡

故人宣城守亦在江南偏如何分虎竹相與間山川章
綬胡爲者形骸非自然含情津渡闊倚望脰空延遠近
聞佳政平生仰大賢推心徒有屬會面良無緣日夕遵
前渚江村投暮煙念行祗意默懷遠豈言宣委曲風波
事難爲尺素傳

敬酬張九齡

裴耀卿

茂先寔王佐仲舉信時英氣覩衝天發人將下榻迎珪
符肅有命江國遠徂征九派期方越千鈞一作可輕
高帆出風迴孤嶼入雲平遄邁嗟于役離憂空自情飾
簪陪早歲接壤厠專城曠別心彌軫宏規義一作意轉傾
徒然恨饑渴況乃諷瑤瓊

寄孟五少府

高適

秋氣一作風落窮巷離憂兼暮蟬後時已如此高興亦徒
然知君念淹泊憶我屢周旋征路見來鴈歸人悲遠天
平生感一作各千里相望在真賢一作堅

舟中出江陵南浦寄鄭少尹審 杜甫

更欲投何處飄然出此都形骸元土木舟楫復江湖社稷纏妖氣干戈送老儒百年同棄物萬國盡窮途雨洗平沙淨天銜闊岸紆鳴蜩隨泛梗別燕赴一作秋菰棲託難高臥饑寒迫向隅寂寥相煦沫浩蕩報恩珠溟漲鯨波動衡陽鴈影徂南征問懸榻東逝想乘桴濫竊商歌聽時憂卞泣誅經過憶鄭驛斟酌旅情孤

自樂城赴永嘉枉路泛白湖寄松陽李少府


張子容

西行礙淺石北轉入谿橋樹色煙輕重湖光風動搖百

花亂飛雪萬嶺疊青霄猿挂臨潭篠鷗迎出浦撓惟應賞心客茲路不言遙

寄隴右嚴判官 劉方平

副相西征重蒼生屬望晨還同周薄伐不取漢和親虜陣摧枯易王師決勝頻高旗臨鼓角太白靜風塵赤狄爭歸化青羌已請臣遙傳闔外美盛選幕中賓玉劔光初發冰壺色自真忠貞期報主章服豈榮身邊草含風綠征鴻過月新胡笳長出塞隴水半歸秦絕漠多來往連年厭苦辛路經西漢雪家擲後園春誰念煙雲裏深居汝潁濱一叢黃菊地九日白衣人松葉疎開嶺桃花



密映津縑書若有寄為訪許由鄰

山行寄劉李二叅軍

盧照隣

萬里煙塵客三春桃李時事去紛無限愁來不自持狂
歌欲歎鳳失路反占龜草礙人行緩花繁鳥度遲彼美
參卿事畱連求友詩安知倦遊子兩鬢漸如絲

寄許八

張說

萬類春皆樂徂顏獨不怡年來人更老花發意先衰乳
鵲穿壇畫巢蜂觸網絲平生美容色宿昔影中疑遠道
何由夢同心在者誰西風欲寄語憫默遂無詞

寄李十二白

杜甫

昔年有狂客號爾謫仙人筆落驚風雨詩成泣鬼神聲
名從此大汨沒一朝伸文彩承殊渥流傳必絕倫龍舟
移棹晚獸錦奪袍新白日來深殿青雲滿後塵乞歸優
詔許遇我宿心親未負幽棲志兼全寵辱身劇談憐野
逸嗜酒見天真醉舞梁園夜行歌泗水春才高心不展
道屈善無鄰處士禰衡俊諸生原憲貧稻粱求未足意
苾謗何頻五嶺炎蒸地三危放逐臣幾年遭鵬鳥獨泣
向麒麟蘇武先還漢黃公豈事秦楚筵辭醴日梁獄上
書辰已用當時法誰將此義陳老吟秋月下病起暮江
濱莫怪恩波隔乘槎與問津

寄張十二山人彪

獨臥嵩陽客三違潁水春艱難隨老母慘澹向時人謝
 氏尋山屐陶公漉酒巾羣兇彌宇宙此物在風塵歷下
 辭姜被關西得孟鄰早通交契密晚接道流新靜者心
 多妙先生藝絕倫草書何太古詩興不無神曹植休前
 輩張芝更後身數篇吟可老一字買堪貧將恐曾防寇
 深潛託所親寧聞倚門夕盡力潔餐晨疎懶為名誤驅
 馳喪我真索居猶寂寞相遇益愁辛流轉依邊徼逢迎
 念席珍時來故舊少亂後別離頻世祖修高廟文公賞
 從臣商山猶入楚渭水不離秦存想青龍秘騎行白鹿

馴耕巖非谷口結草即

一作在

河濱肘後符應驗囊中藥

未陳旅懷殊不愜良覲眇無因自古皆悲恨浮生有屈
 伸此邦今尚武何處且依仁鼓角凌天籟關山倚月輪
 官場羅鎮磧賊火近洮岷蕭瑟論兵地蒼茫鬪將辰大
 軍多處所餘孽尚紛綸高興知籠鳥斯文起獲麟窮秋
 正搖落回首望松筠

春日歸山寄孟六浩然

李白

朱紱遺塵境青山謁梵筵金繩開覺路寶筏度迷川嶺
 樹攢飛拱巖花覆谷泉塔形標海月樓勢出江煙香氣
 三天下鐘聲萬壑連荷秋珠已滿松密蓋初圓鳥聚疑

聞法龍叅若護禪愧非流水韻叨入伯牙絃

與崔二十一遊鏡湖寄包賀二公 孟浩然

試覽鏡湖水中流到一作見底清不知鱸魚味但識鷗鳥

情帆得樵風送春逢穀雨晴將探一作特尋夏禹穴稍背越

王城府掾有包子文章推一作及醉後唱因子一作此

寄同聲

弊廬遣興寄嚴公

杜甫

野水平橋路春沙映竹村風輕粉蝶喜花煖蜜蜂喧把

酒宜深酌題詩好細論府中瞻暇日江上憶詞源跡忝

一作寄朝廷舊情依節制尊還思長者轍恐避席為門

家園夜坐寄郭微

祖詠

前堦微雨歇開戶散窺林月出夜方淺水涼池更深餘

風生竹樹清露薄衣襟遇物遂遙歎懷人滋遠心依稀

成夢想影響絕徽音誰念窮居者明時嗟陸沈

萬州曉發放舟乘漲寄蜀中親朋 陳子昂

空濛巖一作微雨霽爛熳曉雲歸嘯一作肅旅乘明發奔橈

鷺斷磯蒼茫林岫轉絡繹漲濤飛遠岸孤煙出遙峯曙

日微前瞻未能眴坐望已相依曲直多一作還今古經過

失是非還期一作多岐方浩浩征思日駢駢寄謝千金子江

海事多違

非律五言

卷三十一

二十一

淮南寄舍弟

王泠然

昔予從不調經歲旅淮源念爾長相失何時返故園寄
書迷處所分袂隔涼溫遠道俱為客他鄉共在原歸情
春伴鴈愁泣夜隨猿愧見高堂上朝朝獨倚門

敘寄負半千

駱賓王

薄宦三河道自負十餘年不應驚若厲祗為直如弦坐
歷山川險吁嗟陵谷遷長吟空抱膝短翮詎冲天魂歸
滄海上望斷白雲前釣名勞拾紫隱迹自談玄不學多
能聖徒思鴻寶仙斯志良難已此道豈徒然嗟為刀筆
吏恥從繩墨牽岐路情雖狎人倫地本偏長揖謝時塵

獨往訪林泉寄言二三子生死不來旋

畱上李右相

高適

風俗登淳古君臣挹大庭深沈謀九德密勿契千齡獨
立調元氣清心豁窅冥本枝連帝系長策冠生靈傳說
明殷道蕭何律漢刑鈞衡持國柄柱石總朝賢一作經隱
軫江山藻氣氤鼎鼐銘興中皆白雪身外即丹青江海
呼窮鳥詩書問聚螢吹噓成羽翼提握動芳馨倚伏悲
還笑棲遲一作沈醉復醒恩榮初就列含育忝宵形有竊
丘山惠無時枕席寧壯心瞻落景生事感浮一作流萍莫
以才難用終期善易聽未為門下客徒謝少微星

上韋左相

韋見素也

杜甫

鳳曆軒轅紀龍飛四十春八荒開壽域一氣轉洪鈞
霖雨思賢佐丹青憶老臣應圖求駿馬驚代得騏驎
沙汰江河濁調和鼎鼐新韋賢初相漢范叔已歸秦
盛業今如此傳經固絕倫豫章深出地滄海闊無津
北斗司喉舌東方領搢紳持衡留藻鑑聽履上星辰
獨步才超古餘波德照鄰聰明過管輅尺牘倒陳遵
豈是池中物由來席上珍廟堂知至理風俗盡還淳
才傑俱登用愚蒙但隱淪長卿多病久子夏索居貧
一作回首驅流俗生涯似衆人巫咸不可問鄒魯莫容身
感激時將晚蒼蒞

興有神爲公歌此曲涕淚在衣巾

荆門上張丞相

孟浩然

共理分荆國招賢媿楚材召南風更闡丞相閣還開
觀止欣眉睫沈淪拔草萊坐登徐孺榻頻接李膺杯
始慰蟬鳴柳俄看雪間梅四時年籥盡千里客程催
日下瞻歸翼沙邊厭曝鰓佇聞宣室召星象列三台
一作

上張令公

王維

珥筆趨丹陛垂璫上玉除步檐青瑣闥方憶畫輪輿
帝闕千金字朝聞五色書致君光帝典薦士滿公車
伏奏迴金駕橫經重石渠從茲罷角觝且復幸儲胥
天統知

堯後王章笑魯初匈奴遙俯伏漢相儼簪裾賈生非不
遇汲黯自堪疎學易思求我言詩或起予嘗從大夫後
何惜隸人餘

投哥舒開府翰

杜甫

今代麒麟閣何人第一功君王自神武駕馭必英雄開
府當朝傑論兵邁古風先鋒百戰一作勝在略地兩隅空
青海無傳箭天山早挂弓廉頗仍走敵魏絳已和戎每
惜河湟棄新兼節制通智謀垂睿想出入冠諸公日月
低秦樹乾坤繞漢宮胡人愁逐北宛馬又從東受命邊
沙遠歸來御席同軒墀曾寵鶴畋獵舊非熊茅土加名

歎山河誓始終策行遺戰伐契合動昭融勳業青冥上
交親氣槩中未爲珠履客已見白頭翁壯節初題柱生
涯獨轉蓬幾年春草歇今日暮途窮軍事畱孫楚行間
識呂蒙防身一長劔將欲倚崆峒

伯奴邊見歸田賦因投趙侍御

張說

爾家歎窮鳥吾族賦歸田莫道榮枯異同嗟世網牽黃
陵浮汨渚青歲會湘川去國逾三歲茲山老二年寒鴉
鳴舍下昏虎臥籬前客淚堪斑竹離憂欲贈荃放言久
無次觸興感成篇

奉酬燕公

趙冬曦

窮鳥嬰籠綴孤飛任播遷鷓鴣王佐用復此挫沖天楚
雲何掩鬱湘水亦迴遘懷哉愧木鴈忽爾枉蘭荃愈疾
同枚叔銷憂比仲宣歸途書可畏弱操石猶堅覆載雖
云廣涔陽直塊然

冬日述懷呈韋祭酒張左丞蘭臺名賢

崔日知

弱齡好經籍披卷卽怡然覃精四十載馳騁數千言孔
壁采遺篆一作周韋考絕編袁公論劔術孫子敘兵篇
魯史君臣道姬書日月懸從師改炎燠負笈遍山川上
異西河夏中非北海玄光榮拾青紫名價接通賢既重

萬鍾樂寧思二頃田長戟同分虎高冠亞一作附蟬脫

懷重虛曠養志息雕鐫登高慙思拙匠物謝情妍不慕

張平子寧希一作王仲宣誰謂登龍日翻成刻鵠年循

循勞善誘軋軋思微牽琢磨才既竭鑽仰德彌堅朽木

誠爲諭捫心徒自憐終期吞鳥夢振翼上雲煙賦成先

擲地詞高直揆天更執樞衣禮仍開函文筵霧披槐市

藹水靜壁池圓願逐從風葉飛舞翰林前

酬崔光祿序曰太極殿衆君子分司洛城自春涉

頃因公讌方接詠言崔光祿述志論文首貽雅
唱諸公嘉德敘事成有報章若夫盛時榮位華
景勝會此四者古難一遇而我輩比實兼之至
於精言探道妙識發義戲謔而逢規戒指諷而

見師表益過三友豈易得乎謂膏澤俯潤芝蘭
久襲韋公近之矣以文會友以友輔仁崔公近
之矣其餘尋聲響答望形影赴故亦浚碧池之
連漪增瑤林之沃若是用綴集勒成一卷永存
几閣之翫無忘歡好之時焉

張說

徐陳嘗並作枚馬亦同時各負當朝譽俱承明主私夫
君邁前侶觀國騁奇姿山似鳴威鳳泉如出寶龜才雄
子雲筆學廣仲舒帷紫綬拂三寺朱門臨九達昔我含
香日聯爾縉雲司朝携蘭省步夕退竹林期中路一分
手數載來何遲求友還相得羣英復在茲畱臺少人務
方駕遞尋追涉玩懷同賞霑芳憶共持迎賓南澗飲載
妓東城嬉春郊綠畝秀秋澗白雲滋名畫披人物良書

討滯疑興來光不惜歡往迹如遺歲晏罷行樂層城間
所思夜魂燈處厭朝髮鏡前衰忽枉崔駟什兼流韋孟
詞曲高彌寡和主善代爲師齋戒觀華玉畱連歎色絲
終慙起予者何足與言詩

酬崔光祿

序曰光祿崔卿公懷通識濟時良具材
器耽圖籍愛林泉不遺琴詠門多長者
善與人交僕忝臺閣早經聯事雖幸揖風采而
不接慙勤崔公以雅道自居未嘗至偃之室及
僕積抱羸疾屢期放退朝廷恩假職以優閒多
取急歸林服餌爲事門堪羅雀庭見狎鷗崔公
則多存訪不避風雨方知向時迹也今晨情也
蘭菊春秋自芳竹栢歲寒無變僕敬之重之故
不能忘也嘗談及詞翰頗申掎摭
忽枉贈章因以投報云爾

韋嗣立

亭伯負高名羽儀稱上京魏珠能燭乘秦璧許連城六

月飛將遠三冬學已精洛陽推賈誼江夏貴黃瓊推演
中都術旋參河尹聲累遷登御府移拜踐名卿庭聚歌
鍾麗門羅檠戟榮鸚杯飛廣席獸火列前楹散誕林園
意殷勤敬愛情無容抱衰疾良宴每招迎契得心逾重
言忘道益貞相勗忠義節共談詞賦英雕蟲曾靡棄白
鳳已先鳴光接神愈駭音來味不成短歌甘自思鴻藻
彌難清東里方希潤西河敢竊明厚誣空見迫喪德豈
無誠端守官闈地寒煙朝暮平顧才無術淺懷器識憂
盈月下對雲闕風前聞夜更昌年雖共偶歡會此難并
爲憐漳浦曲沈痼有劉楨

和日知光祿弟

序曰韋祭酒張左丞二公並廊廟
偉才朝廷舊相咸光首和殊爲佳
作輒繼陽春深增愧悚

崔泰之

吾族白眉良才華動洛陽觀光初入仕應宿始爲郎飛
螢翫書籍白鳳吐文章海卿逾往雅河尹冠前張擇才
綏鄢郢殊化被江湘高樓臨廣陌甲第敞通莊列館印
山下疏亭洛水傍昌年賞豐陌暇日悅林塘衣冠皆秀
彥一作茂羅綺盡名倡隔岸聞歌度臨池見舞行門庭寒
變色檠戟自生光窮陰方變黷殺氣正蒼茫感時興盛
作晚歲共多傷積德韋丞相通神張子房吟草編簪紱
逸韻合宮商功名守畱省濫迹在文昌家園遙可見臺

寺近相望無庸乘侍謁有暇共翱翔棣華依鴈序竹葉
拂鸞觴水坐憐秋月山行弄晚芳恩華慙服冕友愛勗
垂堂無由報天德相顧詠時康

齒坐呈山南諸隱

孟浩然

習公有遺坐高在白雲陞樵子不見識山僧賞自知以
余爲好事攜手一來窺竹露閒夜滴松風清晝吹從來
抱微尚况復感前規於此無奇策蒼生奚以爲

示宗武

杜甫

覓可新知律攤書解滿牀試吟青玉案莫帶一作紫羅
囊暇日從時飲明年共我長應須飽經術已似愛文章

十五男兒志三千弟子行曾參與游夏達者得升堂

山中示弟等

王維

山林吾喪我冠帶爾成人莫學嵇康懶且安原憲貧山
陰多北戶泉水在東隣緣合妄相有性空無所親安知
廣成子不是老夫身

合州津口別舍弟至東陽峽步趨不及眷然有憶
作以示之

陳子昂

江潭共爲客洲浦獨迷津思積芳庭樹心斷白眉人同
衾成楚越別島類胡秦林岸隨天轉雲峰逐望新遙遙
終不見默默坐含嚔念別疑三月經遊未一旬孤舟多

逸興誰共爾爲隣

夏夜憶張二

駱賓王

伏枕憂思深擁膝獨長吟烹鯉無尺素筌魚勞寸心疎
麻空有折芳桂湛無斟廣庭含夕氣閒宇澹虛陰織蟲
垂夜砌驚鳥棲暝林驩娛百年促羈病一生侵詎堪孤
月夜流水入鳴琴

遠懷舍弟穎觀等

杜甫

陽翟空知處荆南近得書積年仍遠別多難不安居江
漢春風起冰霜昨夜除雲天猶錯莫花萼尚蕭疎對酒
都疑夢吟詩正憶渠舊時元日會鄉黨羨吾廬

始背洛城秋郊矚日奉懷臺中諸侍御

蘇味道

薄遊忝霜署直指戒冰心荔浦方南紀衡皋暫北臨山
晴關塞斷川暮廣城陰場圃通圭甸溝塍礙石林野童
來捃拾田叟去謳吟蟋蟀秋風起蒹葭晚露深帝城猶
鬱鬱征傳幾駸駸迴憶披書地勞歌謝所欽

佐郡思舊遊

序曰巳亥歲春三月參自補闕轉起居舍人夏四月署號州長史適見秋

草涼風復來昔桓譚出爲六安丞常忽忽不樂今知之矣悲州縣瑣屑思掖垣清閒呈左右省

岑參

幸得趨紫殿却憶侍丹墀史筆衆推直諫書人莫窺平

生恒自負垂老此安卑同類皆先達非才獨後時庭槐
宿鳥亂階草夜蟲悲白髮今無數青雲未有期

西山尋辛諤

孟浩然

漾舟尋一作乘水便因訪故人居落日清川裏誰言獨羨
魚石潭窺洞徹沙岸歷紆徐一作餘竹嶼見垂釣茅齋聞
讀書欸言忘景夕清興屬涼初回也一瓢飲賢哉常晏
如

河南嚴尹弟見宿弊廬訪別人賦十韻

王維

上客能論道吾生學養蒙貧交世情外才子古人中冠

上方簪豸車邊已畫熊拂衣迎五馬垂手憑雙童花醪
和松屑茶香透竹叢薄霜澄夜月殘雪帶春風古壁蒼
苔黑寒山遠燒紅眼看東侯別心事北川同爲學輕先
輩何能訪老翁欲知今日後不樂爲車公

江上暫別蕭四劉三旋欣接遇 陳子昂

昨夜滄江別言乖天漢遊寧期此相遇尚接武陵洲結
綬還逢育一作貢銜杯且對劉波潭一瀾瀾臨望幾悠悠
山水丹青雜煙雲紫翠浮終愧神仙友來接野人舟

宋中遇陳二

高適

常忝鮑叔義所期一作寄王佐才如何守苦節獨此一作自

無良媒離別十年外飄飄千里來安知罷官後惟見柴
門開窮巷隱東郭高堂詠南陔籬根長花草井上一作
生一作莓苔伊昔一作望霄漢于今倦蒿萊一作終然
男兒命未達一作男兒須命達一作且進手中杯
先是新昌小園期京尹一訪兼郎官數子自頃沈
痾年復一年茲願不果率然成章 蘇頲
獨好中林隱先期上月春閒花傍戶落喧鳥逼簷馴寂
冥東陂叟傳呼北里人在山琴易調開甕酒歸醇佇望
應三接彌留忽幾旬不疑丹火變空負綠條新鬪蟻聞
常日歌龍值此辰其如衆君子嘉會阻清塵

喜柳司馬至

杜甫

有使一作歸三峽相過問兩京函關猶出將渭水更屯
兵設備邯鄲道和親邏些一作城幽燕唯鳥去商洛少
人行衰謝身何補蕭條病轉嬰霜天到宮闕戀主寸心
明

奉漢中王手札

國有乾坤大王今叔父尊剖符來蜀道歸蓋取荆門峽
險通舟過一作峻江長注海奔主人畱上客避暑得名園
前後緘書報分明饌玉恩天雲浮絕壁風竹在華軒已
覺涼一作宵永何看駭浪翻入期朱邸雪朝傍紫微垣

枚乘文章老河間禮樂存悲秋宋玉宅失路武陵源淹
泊俱崖口東西異石根夷音迷咫尺鬼物傷黃昏犬馬
誠爲戀狐狸不足論從容草奏罷宿昔奉清樽

得家書

去憑遊客寄來爲附家書今日知消息他鄉且舊居熊
兒幸無恙驥子最憐渠臨老羈孤極傷時會合踈二毛
趨帳殿一命侍鸞輿北闕妖氛滿西郊白露初涼風新
過鴈秋雨欲生魚農事空山裏眷言終荷鋤

續得觀書迎就當陽居止正月中旬定出三峽

自汝到荆府書來數喚吾頌椒添諷詠禁火卜歡娛舟

楫因人動形骸用杖扶天旋夔子峽春近岳陽湖發口
排南喜傷神散北吁飛鳴還接翅行序密銜蘆俗薄江
山好時危草木蘇馮唐雖晚達終覲在皇都

在廣州聞崔馬二御史並拜臺郎蘇味道

振鷺齊纜一作飛日遷鶯遠聽聞明光共待漏清覽一作

各披雲喜得廊廟舉嗟爲臺閣分故林懷栢悅一作梓一作新

幄一作握一作阻蘭薰冠去神羊影車迎一作連一作瑞雉羣遠從一作

憐獨南斗外遙一作空一作仰列星文

秦州見勅除一作目薛三璩授司議郎畢四曜除監

察與二子有故遠喜遷官兼述索居凡三十韻

杜甫

大雅何寥闊斯人尚典刑
交期余潦倒材力爾精靈
二子聲一作同日諸生困
一經文章開突奧遷擢潤朝廷
舊好何由展新詩更憶聽
別來頭併白相見眼終青
伊昔貧皆甚同憂歲一作
不寧栖遑分半菽浩蕩逐流萍
俗態猶猜忌妖氛遂一作
杳冥獨慙投漢閣俱議哭秦
庭還蜀祗無補一作益
囚梁亦固局華夷相混合宇宙一
羶腥帝力收三統天威總四溟
舊都俄望幸清廟肅惟馨
雜種雖高壘一作高壁
難長驅甚建瓴焚香淑景殿漲水
望雲亭法駕初還日羣公若會星
宮臣仍點染柱史正

官忝趨棲鳳朝回歎一作聚螢喚人看
變夏不嫁惜娉婷掘劍知埋獄
提刀見發劓侏儒應共飽漁父忌
偏醒旅泊窮清渭長吟望濁涇
羽書還似急烽火未全停
師老資殘寇戎生及近垌
忠臣辭憤激烈士涕飄零
上將盈邊鄙元勳溢鼎銘
仰思調玉燭誰定握青萍
隴俗輕鸚鵡原情類鵠鷓
秋風動關塞高臥想儀形

答燕公

趙冬曦

誰道零陵守東過此地遊
友僚同省闈昆弟接荊州
我逐江潭鴈君隨海上鷗
屢傷神氣阻久別鬢毛秋
疑嶺春應遍陽臺雨欲收
主人情未盡高駕少淹留

酬睢陽李太守

高適

公族稱王佐朝經允帝求本枝疆我李磐石冠諸劉禮
樂光輝盛山河氣象幽系高周柱史名重晉陽秋華省
膺推擇青雲寵宴遊握蘭多具美前席有嘉謀賦得黃
金賜言皆白璧酬着鞭驅駟馬操刃解全牛出鎮兼方
伯承家復列侯朝瞻孔北海時用杜荊州廣固纔登陟
毘陵忽阻修三台期入夢四岳尚分憂郡邑連京口山
川望石頭海門當建節江路引鳴騶俗見中興理人逢
至道休先移白額橫更息赭衣偷梁國歌來晚徐方怨
不畱豈伊齊政術將以變澆浮訟簡知能吏刑寬察要

囚坐堂風偃草行縣雨隨輶地是蒙莊宅城遺闕伯丘
孝王餘井徑微子故田疇冬至招搖轉天寒蟬蛩收猿
巖飛雨雪兔苑落梧楸列戟霜侵戶塞帷月在鈎好賢
常解榻乘興每登樓逸足橫千里高談注九流詩題青
玉案衣贈黑貂裘窮巷軒車靜閒齋耳目愁未能方管
樂翻欲慕巢由講德良難敵觀風豈易儔寸心仍有適
江每一扁舟

江上答崔宣城

李白

太華三芙蓉明星玉女峯尋仙下西嶽陶令忽相逢問
我將何事湍波歷幾重貂裘非季子鶴氅似王恭謬忝

燕臺召而陪郭隗蹤水流知入海雲去一作或從龍樹
繞蘆洲月山鳴鵲鎮鐘還期如可訪台嶺蔭長松

酬號州李司法

楊炯

脣齒標形勝關河壯邑居寒山抵方伯秋水面鴻臚君
子從遊宦忘情任卷舒風霜下刀筆軒蓋擁門閭平野
芸黃遍長洲鴻鴈初菊花宜泛酒蒲葉好裁書昔我芝
蘭契悠然雲雨疎非君重千里誰肯惠雙魚

酬張少府柬之

盧照隣

昔余與夫子相遇漢川陰珠浦龍猶臥檀谿馬正沈價
重瑤山曲詞驚丹鳳林十年睽賞慰萬里隔招尋毫翰

風期阻荆衡雲路深鵬飛俱望昔蠖屈共悲今誰謂青
衣道還歎白頭吟地接神僊澗江連雲雨岑飛泉如散
玉落日似懸金重以瑤華贈空懷舞詠心

酬別杜二

嚴武

獨逢堯典日再覩漢官時未效風霜勁空慙雨露私夜
鐘清萬戶曙漏拂千旗並向殊庭謁俱承別館追斗城
憐舊路鍋水惜歸期峯樹還相伴江雲更對垂試迴滄
海棹莫妬敬亭詩祇是書應寄無忘酒共持但令心事
在未肯鬢毛衰最悵巴山裏清猿醒一作夢思

王閬州筵奉酬十一舅惜別之作 杜甫

萬壑樹聲滿千崖秋氣高浮舟出郡郭別酒寄江濤良
 會不復久此生何太勞窮愁但有骨羣盜尚如毛吾舅
 惜分手使君寒贈袍沙頭暮黃鵠一作鶴失侶亦一作自哀
 號

江寧酬鄭縣劉少府兄贈別作

獨孤及

往年脫縫掖接武仕關西結綬腰章並趨堦手版齊仙
 山不用買朋酒日相携抵掌誇潭壑忘情何組珪事遷
 時既往年長跡逾睽何為青雲器猶嗟濁水泥役牽方
 遠別道在或先迷莫見良田晚遭時亦杖藜

酬趙二侍御使西軍贈兩省舊寮之作

張九齡

石室先鳴者金門待制同操刀嘗願割持斧竟稱雄應
 敵兵初起緣邊虜欲空使車經隴月征旆繞河風忽枉
 兼金訊非徒秣馬功氣清一作凌蒲海曲聲滿栢臺中顧
 已塵華省欣君震遠戎明時獨匪報嘗欲退微躬

酬宋使君見贈

時來不自意宿昔謬樞衡翊聖負明主妨賢媿友生罷
 歸猶右職待罪尚南荆政有畱棠舊風因繼組成一作清
 高軒一作軒車問疾苦蒸一作黎庶荷仁明衰廢時所薄祗言
 僚故情

酬睢陽路太守見贈

高適

盛才膺命代高價動良時帝簡登藩翰人和發詠思神
仙去華省鴈鷺憶丹墀清淨能無事優游即賦詩江山
紛想像雲物共一作動菱蕤逸氣劉公幹玄言向子期多
慙汲引速翻愧激昂遲相馬知何限登龍反自疑風塵
吏道迫行邁旅心悲拙疾徒為爾窮愁欲問誰秋庭一
片葉朝鏡數莖絲州縣甘無取丘園悔莫追瓊瑤生篋
笥光景借茅茨他日青霄裏一作騎猶應訪所知

酬汴州李別駕贈

祖詠

秋風多客思行旅厭艱辛自洛非才子遊梁得主人文

草參末議榮賤豈同倫歎逝逢三演懷賢憶四真一作歎世

同王演懷賢憶法真情因恩舊好契託死生親所媿能投贈清言

益潤身

酬李丹徒見贈

宋之問

鎮吳稱粵理試劇仰通才近挹人披霧遙聞境震雷一
朝逢解榻累日共銜杯連轡登山盡浮舟望海迴以予
慙拙宦期子遇良媒贈曲南鳧斷征途北鴈催更憐江
上月還入鏡中開理一作里

酬河南節度使賀蘭大夫見贈

高適

高閣憑欄檻中軍倚旆旌感時常激切於已即忘情河

華屯妖氣伊瀍有戰聲媿無戡難策多謝出師名秉鉞
知恩重臨戎覺命輕股肱瞻列岳唇齒賴長城隱隱摧
鋒勢光光弄印榮魯連真義士陸遜豈書生直道寧殊
智先鞭忽抗衡楚雲隨去馬淮月尚連營撫劔堪投分
益不平從來重然諾况值欲橫行

酬張五丈垂贈

儲光義

綵服去江汜白雲生大梁星辰動異色羔鴈成新行日
望天朝近時憂郢路長情言問邁軸惠念及滄浪松柏
以之茂江湖亦自忘賈生方弔屈豈敢比南昌

與袁補闕尋蔡拾遺會此公出行後蔡有五韻詩

見贈以此篇答焉

張九齡

韞迹陳家巷詩書孟子鄰偶來乘興者不值草玄人契
是忘年合情非累日申聞君還薄暮見眷及茲辰贈我
如瓊玖將何報所親

武司功初有幽庭春暄見詒夏首獲見以詩報焉

芳月盡離居幽懷重起予雖言春事晚尚想物華初遲

日曷

一作

方照高齋澹復虛筍成林向密花落樹應疎

贈鯉情無間求鶯思有餘暄妍不相待含歎欲焉如

酬宋使君見貽

陟鄰初稟訓獻策幸逢時朝列且云忝君恩復若茲庭

闡際海曲輶傳荷天慈顧已歡烏鳥聞君泣素絲才明
應主召福善豈神欺但願白心在終然涅不淄

酬王履震遊園林見貽

宅生惟海縣素業守郊園中覽霸王說上徼明主恩一
行罷蘭逕數載歷金門既負潘生拙俄從周任言逶迤
戀軒陛蕭散反丘樊舊徑稀人跡前池耗水痕併看芳
樹老唯覺敝廬存自我棲幽谷逢君翳覆盆孟軻應有
命賈誼得無冤江上行傷遠林間偶避喧地偏人事絕
時霽鳥聲繁獨善心俱閉窮居道共尊樂因南澗藻憂
豈北堂萱幽意加投漆新詩重贈軒平生狗知已窮達

與君論

酬田逸人遊巖見尋不遇題隱居里壁

陳子昂

遊人獻書去薄暮返靈臺傳道尋仙友青囊賣卜來聞
鶯忽相訪題鳳久徘徊石髓空盈握金經秘不開還疑
縫掖子復似洛陽才

和李明府

駱賓王

傳聞葉縣履飛向洛陽城馳道臨層掖津門對小平霞
殘疑製錦雲度似飄纓藻揆潘江澈塵虛范甑清詎憐
衝斗氣猶向匣中鳴

奉和崔尚書贈大理陸卿鴻臚劉卿見示之作

蘓頌

戲藻嘉魚樂棲梧高鳳飛類從皆有召聲應乃無違美
價逢時出奇才選衆稀避堂貽後政掃第一作發前幾
出曳仙人履還薰侍女衣省中何赫奕庭際滿芳菲吏
部端清鑒丞郎肅紫機會心歌詠是迴迹宴言非北寺
鄰玄闕南城寫翠微參差交隱見髣髴接光輝賓序嘗
柔德刑孚已霽威巨源林下契不速自同歸

和張判官登萬山亭因贈洪府都督韓公

孟浩然

韓公美

一作是

襄土

一作是

日賞城西岑

結構意不淺巖潭

趣轉

一作亦

深皇華

一動詠荆國幾謠

一作謳

吟舊徑蘭勿

剪新堤柳欲陰砌傍餘怪石沙上有閒禽自牧豫章郡
空瞻楓樹林因聲寄流水善聽在知音耆舊眇不接崔
徐無處尋物情多貴遠賢俊豈遺今遲爾長江暮澄清
一洗心

和劉長史答十九兄

楊炯

帝堯平百姓高祖宅三秦子弟分河岳衣冠動縉紳盛
名恒不隕歷代幾相因街巷塗山曲門閭洛水濱五龍
金作友一子玉為人寶劍豐城氣明珠魏國珍風標自

卷三十一 四十一

落落文質且彬彬共許刁一作陶元亮同推周伯仁石城

俯天闕鍾阜對江津驥足方遐騁狼心獨未馴鼓鼙鳴

九域風火集重闔城勢餘三板兵威乏四鄰居然混玉

石直置保松筠耿介酬天子危言數賊臣鍾儀琴未奏

蘇武節猶新受祿寧辭死揚名不顧身精誠動天地忠

義感明神怪鳥俄垂翼脩蛇竟暴鱗來朝拜休命述職

下梁岷善政馳金馬嘉聲繞玉輪三荆忽有贈四海更

相親宮徵諧鳴石光輝掩燭銀山川遙滿目零露坐沾

衣愛光天下恩波浹後塵儒夫仰高節下里繼陽春

和梁王衆傳張光祿是子晉後身 崔融



